

Broj: 01-02-3-1561/17
Sarajevo, 30.10.2017. godine

Z A P I S N I K
24. REDOVNE SJEDNICE PREDSTAVNIČKOG DOMA PARLAMENTA FEDERACIJE
BiH, održane 26.09.2017. godine

Sjednica je počela u 10.48.

Sjednici je predsjedavao predsjedavajući Predstavničkog doma Parlamenta Federacije BiH Edin Mušić.

Predsjedavajući Mušić pozdravio je zastupnice i zastupnike, članove Vlade Federacije BiH, goste kao i predstavnike akreditiranih medijskih kuća koji prate rad sjednice.

Odsustvo sa sjednice opravdali su: Mirsad Topčagić, Alma Aranaut, Amra Haračić, Mirsad Kukić, Anela Šestić-Begović, Nasir Beganović i Ljuban Herceg a kašnjenje su najavili Midhat Karović i Mirza Ganić.

Prema evidenciji Stručne službe, predsjedavajući je konstatovao da sjednici prisustvuje dovoljan broj zastupnika za kvalitetan rad i odlučivanje.

Zapisnici 20. i 21. redovne sjednice usvojeni su bez primjedbi.

Zastupnička pitanja

Damir Mašić kazao je da je Upravni odbor Udruženja bh. novinari uputilo javni protest Federalnoj upravi policije zbog verbalnih prijetnji i neprofesionalnog ponašanja policije prema ekipi Radija Slobodna Evropa (Marija Arnautović i Midhat Poturović), koji su trebali snimati proteste pred Parlamentom. Traži odgovore u vezi sa ovim incidentom kako od nadređenih, tako i od Federalne uprave policije i rukovodstva Parlamenta Federacije BiH. Tada se održavala sjednica Doma naroda pa bi prije svega odgovor trebala dati predsjedavajuća Doma naroda Lidija Bradara.

Drugo pitanje vezano je uz revizorske izvještaje za 2016. godinu federalnih organa uprave, odnosno ministarstava. Naveo je kao jedan od loših primjera i Federalno ministarstvo kulture i sporta, te citira "kod raspodjele spomenutih sredstava komisija nije vršila vrednovanje pristiglih zahtjeva za dodjelu interventnih sredstava niti su sektori ministarstva učestvovali sa prijedlozima za donošenje odluka o raspodjeli planiranih sredstava". Pita ministricu – šta se prekršilo i koji su razlozi toga? Osvrnuo se i na nedolazke ministara na sjednice.

Kada je u pitanju Federalno ministarstvo kulture i sporta u revizorskom izvještaju piše da su odobrena sredstva za jednog korisnika za školovanje na postdiplomskom studiju u iznosu 23.000 KM plus porez. To je bilo u 2016. godini kada je to ministarstvo ukinulo besplatne udžbenike za djecu u socijalnoj potrebi. Također, pita koje su osobe koje su dobile sredstva a nisu ispunjavale uvjete za postdiplomske studije?

Posljednje pitanje vezano je uz preduzeće "Željeznice" a tiče se prijave na konkurs za v.d. izvršnog direktora za infrastrukturu.

Mahir Mešalić pitanja je postavio predsjedavajućem Predstavničkog doma Parlamenta Federacije BiH – kazao je da je 11.02.2015. godine 28 zastupnika uputilo u proceduru Prijedlog Zakona o izmjenama Zakona o pripadnosti javnih prihoda, koji do danas nije stavljen na dnevni red. Također, upućen je zahtjev za održavanje vanredne sjednice a tiče se zahtjeva pripadnika Armije RBiH i HVO vezano uz registar. Kazao je da je upućen zahtjev za održavanje vanredne sjednice, vezano uz depolitizaciju obrazovanja.

Rusmir Mesihović postavio je pitanje - koje zakone je donijelo Federalno ministarstvo zdravstva u 2015. godini do danas.

Kakve su cijene lijekova sa A - esencijalne liste u poređenju sa drugim entitetom i zemljama u okruženju?

Treće pitanje – kojim pravilnikom su uređeni uvjeti za rukovodna mjesta u tercijarnim zdravstvenim ustanovama u Federaciji.

Četvrto pitanje - da li je i kada zaživjela implementacija pravilnika o hitnoj medicinskoj pomoći?

Peto pitanje – koliko je pacijenata na osnovu pravilnika o liječenju u Ministarstvu od 2015. godine koristilo tu mogućnost?

Šesto pitanje – koje su nove metode dijagnosticiranja liječenja uvedene u tercijarne medicinske ustanove Federacije BiH?

Jusuf Bubica kazao je da nije zadovoljan dobivenim odgovorima na prethodno postavljena pitanja i inicijative.

Prvo pitanje odnosi se na direktora Zavoda za statistiku Federacije BiH, kojim traži da mu se da tačan broj stanovnika, zaposlenih i onih koji su zaposleni u javnom sektoru u Federaciji?

Drugo pitanje – po kojem Zakonu državni službenik može umiriti staž i otići privremeno na rad u javni sektor, a da ga čeka radno mjesto u državnoj upravi?

Ismet Kurić prvo pitanje postavio je vezano uz prihode BH Telekomu u posljednje tri godine, odnosno direkcije Bihać.

Sljedeće pitanje vezano je uz Prijedlog Zakona o braniteljima, te da li će pripadnici tzv autonomne pokrajine Zapadna Bosna ostvariti to pravo? Da li će ovim izmjenama i dopunama biti provedena presuda Ustavnog suda broj U22/04 i da li će pripadnici 521. i 527. brdske brigade 5. Korpusa Armije BiH po uspostavi registra biti tretirani kao branitelji i naći se u Registru branitelja?

Elvir Karajbić prvo pitanje uputio je PIO Federacije BiH – koliko lica je penzionisano do 31.12.1998. godine?

Naredno pitanje uputio je Agenciji za bankarstvo Federacije BiH - da li su izvršili kontrolu i nadzor nad poslovanjem Razvojne banke, a tiče se imenovanja Mersihe Slipičević za vršioca dužnosti izvršnog direktora za upravljanje rizicima, zbog sumnji da je ovo imenovanje, imajući u vidu način kako je izvedeno, izazvalo rizik po poslovanje banke.

U ime Kluba zastupnika SDPBiH pokreće inicijativu kojom traži da Predstavnički dom Parlamenta Federacije BiH, u skladu sa ovlaštenjima koja direktno proizilaze na osnovu odredaba iz člana 72. Zakona o unutrašnjim poslovima Federacije i Ustava Federacije, pokrene mehanizam parlamentarnog nadzora i kontrole zakonitosti rada FMUP-a i Federalne uprave policije.

Također, predlaže da Komisija za sigurnost Predstavničkog doma imenuje ad hoc istražno radno tijelo, koje će provesti sveobuhvatnu istragu kao sastavni dio parlamentarnog nadzora i kontrole zakonitosti rada Federalne uprave policije i saslušati sve kandidate koji su učestvovali na javnom konkursu, članove Komisije za izbor i druga službena lica koja su uključena kako bi se utvrdile sve relevantne činjenice i donio zaključak o zakonitosti postupanja direktora Federalne uprave policije.

Jozo Bagarić postavio je pitanje u vezi sa dopisom i molbom Ramiza Karića, koji ima problem imovinskoppravne naravi. Traži od Federalne uprave za inspekcijske poslove da provjeri ovaj predmet, napravi pregled i informira ga šta je učinjeno.

Elma Đogić kazala je da na neka pitanja nije dobila odgovore. Postavlja pitanje predsjedavajućem i sekretaru Doma - traži tumačenje određenih članova Poslovnika Predstavničkog doma, te šta se podrazumijeva pod djelokrugom Predstavničkog doma?

Nije zadovoljna odgovorom Javnog preduzeća Ceste Federacije BiH i ponavlja pitanje. Također, obnavlja pitanja vezana uz "Agrokomerc".

Jasmin Kadić prvo pitanje uputio je Vladi Federacije BiH, Vijeću ministara BiH, Federalnom ministarstvu energije, rudarstva i industrije i Ministarstvu za vanjsku trgovinu i ekonomske odnose BiH – šta je sa Vladinom inicijativom iz 2009. godine, koja je upućena prema Vijeću ministara i nadležnom ministarstvu za pokretanje ostvarivanja prava na dio proizvedene električne energije iz Hidroelektrane Zvornik i Bajina Bašta na granici sa Srbijom i Hidroelektrane Dubrovnik, Orlovac i Buško jezero koje koristi Hrvatska? Da li je Vijeće

ministara zauzelo stav o ovom pitanju, da li ga je ikada razmatralo i da li je Vijeće ministara to prenijelo nadležnim institucijama susjednih zemalja, da li je pokretalo ovo pitanje u međudržavnim i međuinstitucionalnim pregovorima i razgovorima, jer se prema analizama stručnjaka radi o milijardama eura, koje uzimaju susjedne zemlje koristeći prirodni vodni resurs.

Ponovo postavlja pitanje predsjedavajućem, osvrćući se na izvještaje javnih preduzeća, posebno elektroprivreda koje nisu na dnevnom redu.

Kasim Mulalić dva pitanja uputio je Federalnom ministarstvu rada i socijalne politike. Prvo je vezano uz izvještaj o provedenoj proceduri za izbor direktora Kantonalne administrativne službe PIO u Bihaću, a drugo pitanje - traži izvještaj o radu svih kantonalnih administrativnih službi PIO.

Darijana Katić pitanje je uputila Vladi Federacije BiH – kolika su ukupna strana ulaganja u Federaciju BiH u posljednje tri godine i koje su zemlje najveći investitori?

Pitanje je uputila Federalnom ministarstvu rada i socijalne politike – koliki je broj registrirane djece bez roditeljskog staranja u BiH, te da li je taj broj veći ili manji u odnosu na prethodne godine?

Pitanje za Federalni zavod zdravstvenog osiguranja i reosiguranja - sa kojim zemljama je BiH zaključila međunarodne sporazume o socijalnom osiguranju na osnovu kojih su regulirana prava koja se odnose na ostvarivanje besplatne zdravstvene zaštite za vrijeme boravka u inozemstvu i koliko su iznosili ukupni troškovi liječenja građana u inozemstvu u prošloj godini?

Naredno pitanje uputila je Vladi Federacije BiH – koliko je operatera registrirano za upravljanje otpadom na prostoru Federacije BiH? Postoje li postrojenja za odvojeno prikupljanje otpada i kolike su trenutno kazne za pravna i fizička lica koja ugrožavaju okoliš nesavjesnim odlaganjem otpada?

Muhamed Ibrahimović pitanje je postavio u pisanom obliku Vladi Tuzlanskog kantona.

Ramiz Meša osvrnuo se na nemile događaje u Kiseljaku. Pozvao je sve, a posebno predsjedavajuću Doma naroda, budući da je sa tih prostora, da da svoj doprinos po pitanju rješavanja problema i smirivanja tenzija.

Predlaže zaključak o ovom pitanju: zadužuje se Predstavnički dom Parlamenta Federacije BiH da imenuje radnu grupu koja bi zajedno sa predstavnicima Ministarstva obrazovanja Srednjobosanskog kantona i direktorima osnovnih škola posjetila i napravila izvještaj o stanju u školstvu i na narednoj sjednici o tome izvijestila Parlament.

Blaž Župarić pitanje je uputio Federalnom ministarstvu poljoprivrede, vodoprivrede i šumarstva - da li će Ministarstvo pomoći u saniranju štete izazvane sušom nakon što općinske komisije za procjenu šteta obave svoj posao i sačine popis štete?

Suzana Franjka Galić pitanje je uputila Federalnom ministarstvu prometa i komunikacija, a vezano je uz Granični prijelaz Kamensko-Vaganj koji je problem i Kantona 10 i Federacije.

Mehrudin Švago dva pitanja uputio je premijeru Novaliću – kakav je interes Federacije u izgradnji minihidroelektrane, da li je to interes Federacije ili pojedinaca? Kakav je interes Federacije BiH da se uništavaju prirodna bogatstva poput rijeke Kruščice i Vitez?

Drugo pitanje je, također, uputio premijeru – koliko je građana Federacije u posljednje dvije godine napustilo Federaciju? Šta se učinilo po tom pitanju kako bi se zaustavio odlazak mladih ljudi iz države?

Jasna Duraković-Hadžiomerović je, u ime Kluba, oštro osudila brutalno policijsko nasilje koje je izvršeno 24.08.2017. godine nad ženama Kruščice u Srednjobosanskom kantonu. Pita premijera Novalića i ministra Čamparu - kako je moguće da su se oglušili na ovaj problem i na nasilje koje se desilo? Da li je moguće da je ministar izjavio da nije nadležan i pokazao nezainteresiranost za ovu problematiku. Traži izjašnjenje u što kraćem roku i poziva ih da preuzmu odgovornost.

Pitanje upućuje ponovo premijeru – kako to da je dozvolio masovni progon ljekara sa Kliničkog centra Univerziteta u Sarajevu? Kako to da se ništa nije učinilo nakon sjednice u maju, kada se tražila smjena rukovodstva Kliničkog centra Univerziteta u Sarajevu i da se

provede daljnja istraga i ispita legitimitet rada kompletnog rukovodstva Kliničkog centra Univerziteta u Sarajevu na čelu sa direktoricom.

Bilsena Šahman se, također, osvrnula na Klinički centar Univerziteta u Sarajevu.

Prvo pitanje uputila je Federalnom ministarstvu zdravstva – koje aktivnosti su proveli vezano uz inicijativu koja je usvojena na sjednici a vezana je uz formiranje Fonda za liječenje rijetkih bolesti uglavnom djece.

Drugo pitanje uputila je Federalnom ministarstvu obrazovanja i traži dostavu informacije i razloge zašto djeca sa problemima u razvoju nisu krenula u školu. Da li je razlog nedostatak odgovarajućeg prostora ili postoje još neki problem u stvaranju uvjeta za obrazovanje djece sa autizmom.

Treće pitanje uputila je Federalnom ministarstvu za rad i socijalnu politiku a vezano je uz zakon koji bi rješavao pitanje zanemarivanja, fizičkog i psihičkog nasilja nad starim i iznemoglim osobama.

Munib Jusufović pitanje je uputio premijeru a vezano je uz Razvojnu banku. Također, pitanje je uputio i Agenciji za bankarstvo koja je i nadležna da vrši kontrolu rada Razvojne banke.

Jasmina Zubić kazala je da je ranije postavljala pitanje u vezi sa Institutom za medicinsko vještačenje. Dobila je odgovor te ponovo postavlja pitanje – da li je na sjednici Upravnog odbora, održanoj 17.08.2017. godine, konačno usvojen Pravilnik o kriterijima i postupku medicinskog vještačenja zdravstvenog stanja?

Naredno pitanje vezano je uz odgovore koje je dobila od Ministarstva trezora i Ministarstva vanjske trgovine. Postavljala je pitanje i uputila inicijativu koja se odnosi na uvođenje taksi za izradu trupaca i rezane građe. Komentarisala je odgovor koji je dobila. Također, napomenula je da je usvojena Inicijativa za uvođenje taksi na izradu drveta (u sklopu zaključaka koji su usvojeni na tematskoj sjednici o stanju drveno-prerađivačke industrije). Traži od ovih ministarstava da se dogovore i usaglase čija je nadležnost i da krenu u realizaciju ove inicijative.

Drugo pitanje upućuje institucijama države BiH i ambasadoru BiH u Sloveniji, a odnosi se na štednju naših građana u Sloveniji - šta je uzrok da Slovenija osporava povrat devizne štednje štedišama Ljubljanske banke sa sjedništem u Federaciji? Šta je Vlada Federacije BiH poduzela da zaštiti štediše čije je pravo na povrat imovine potvrđeno presudom Evropskog suda? Kakav je stav Komiteta ministara Vijeća Evrope po ovom pitanju?

Pokrenula je inicijativu prema Federalnom fondu osiguranja i reosiguranja da na listu ortopedskih pomagala uvrsti perike, zavoje i rukavice za limfo edem na koja bi imala pravo svaka operisana žena sa dijagnozom karcinoma.

Azra Hadžić dva pitanja i inicijativu predaće u pisanoj formi.

Slavica Josipović prvo pitanje uputila je premijeru Vlade a vezano je uz inicijativu za nacionalnu strategiju Federacije BiH.

Drugo pitanje vezano je uz projekt brze ceste Lašva - Nević Polje. Pitanje je ranije postavljala, ali nije dobila odgovor, te traži da joj se odgovori.

Direktoru Agencije magistralne ceste Federacije BiH pitanje će dostaviti pisanim putem.

Alma Kratina komentarisala je događaje vezano uz nasilje u Kruščici. Kazala je da je Klub zastupnika DF postavio pitanje federalnom ministru unutrašnjih poslova i Ministarstvu unutrašnjih poslova Srednjobosanskog kantona, kojim traži jasnu informaciju o poduzetim aktivnostima vezano uz očigledno kršenje ljudskih prava i prekomjernu upotrebu sile nad mještankama Kruščice. Inicijativa se odnosi na reviziju cjelokupnog postupka dobijanja okolišne dozvole, ali i svih dozvola za izgranju minihidroelektrane na Kruščici, detaljno obrazloženje i uvid u transkript sa javnih rasprava provedenih u ovom procesu.

Inicijativu koju je pokretala prema Federalnom ministarstvu rada i socijalne politike, a na koju je dobila odgovor, zahtijeva ponovno pokretanje inicijative prema navedenom ministarstvu a vezano uz pravilnik o raspodjeli sredstava Fonda za profesionalnu rehabilitaciju i zapošljavanje osoba sa invaliditetom za dodjelu novčanog stimulansa za novo zapošljavanje osoba sa invaliditetom, član 6. stav 3.

Pridružuje se podršci i rješavanju pitanja obrazovanja djece sa autizmom.

Saša Mitrović prvo pitanje uputio je Agenciji za reviziju privatizacije u Federaciji – da li su dobili dozvolu od Vlade da izvrše privatizaciju hotela u Tuzli.

Naredno pitanje uputio je Federalnom zavodu za zapošljavanje – kakavi su rezultati projekta programa jačanja na tržištu rada – prvo radno iskustvo.

Treće pitanje ponovo postavlja Vladi Federacije BiH – koliko je grantova podjeljeno u 2016. godini nevladinim organizacijama, udruženjima, fondacijama po kojem kriteriju i da li je Vlada pratila transparentnost utroška tih grantova?

Zukan Helez prvo pitanje uputio je vezano uz nasilje nad ženama u Kruščici, pita ministra i komesara Srednjobosanskog kantona - ko je izdao naredbu za upotrebu sile, a ako nije niko, ko je na svoju ruku od specijalaca izvršio nasilje nad ženama.

Drugo pitanje uputio je Vladi Federacije BiH a vezano je uz ugovore o djelu – ko je sve uposlen po ugovoru o djelu, koje su struke, koliko imaju radnog iskustva, kako se zovu i koliko koštaju državu?

Treće pitanje uputio je Zajedničkoj službi Vlade Federacije – sa koliko stanova raspolaže Vlada, ko stanuje u tim stanovima, ko od visokih funkcionera Armije RBiH i HVO stanuje u tim stanovima, po kojim dozvolama, ko je izdao dozvole?

Zana Marjanović komentarisala je slučaj koji se desio u Kruščici, te pokreće inicijativu – traži od nadležnih institucija da objasne svoje postupke, traži od Komisije za sigurnost Parlamenta Federacije da provede istragu o navedenom događaju i zahtjeva da se dostave svjedočenja, dokazi i dokumenti o rezultatima istrage. Zadužuje se Komisija da izvjesti Dom, Instituciju ombudsmena BiH, Komisiju za ravnopravnost spolova i Komisiju za ljudska prava Parlamenta Federacije BiH i Komisiju za ravnopravnost spolova i Komisiju za ljudska prava Parlamentarne skupštine BiH. Zahtjeva da se prikaže video-snimak na sjednici Doma na kojem je zabilježeno nasilje nad demonstrantkinjama iz Kruščice. Također, zahtjeva da se Dom izjasni o inicijativama.

Pitanje je uputila premijeru i Vladi Federacije BiH – koje je mjere poduzeo kako bi se zaštitile žene od nasilja u Federaciji i kakvi su rezultati primijenjenih mjera?

Hasida Isaković uputila je pitanje Vladi Federacije BiH vezano uz Nacrt Zakona o veterinarsko-medicinskim proizvodima, te kada će se ovaj zakon naći u Domu u vidu prijedloga.

Dženan Đonlagić pitanje je uputio premijeru Vlade Federacije BiH – kakav je formalno-pravni status upravljačkih struktura Razvojne banke Federacije BiH, prije svega uprave i Nadzornog odbora, da li su organi upravljanja Razvojne banke imenovani u punom kapacitetu kako to i predviđa Zakon o Razvojnoj banci Federacije BiH i Statut Razvojne banke?

Ilhan Bušatlić se, također, osvrnuo na događaje u Kruščici, te pita kada je posljednji put imao psihijatrijski pregled komesar MUP-a Srednjobosanskog kantona. Ranije je postavljao pitanja u vezi sa psihološkim pregledom pripadnika specijalaca.

Drugo pitanje - traži da mu se dostavi za sve javne ustanove, javna preduzeća, agencije i fondove, koji su u nadležnosti Federacije BiH: visina netoplaća direktora i naknade koje primaju članovi i predsjedavajući upravnih i nadzornih odbora.

Inicira da Parlament Federacije BiH definira visinu primanja te da budu ujednačena za sve članove nadzornih odbora a da ta naknada ne smije biti veća od naknade i paušala koji primaju zastupnici.

Također, osvrnuo se na proteste RVI koji su pred zgradom i koji traže jedinstveni registar a zastupnici se prave kao da se ništa ne dešava.

Faruk Čupina postavio je pitanje – kada će se u parlamentarnoj proceduri naći inicijativa o raspodjeli sredstava iz akumulirane dobiti javnih preduzeća i klirinškog duga Ruske federacije za realizaciju infrastrukturnih projekata u Federaciji BiH?

Drugim pitanjem traži da mu se dostavi informacija o neuplaćenim doprinosima za PIO za zaposlenike u javnom sektoru Federacije BiH.

Treće pitanje - traži dostavljanje informacije o raspodjeli novčanih sredstava Federalnog ministarstva obrazovanja i nauke u okviru sredstava rezervi, inteligentne potrebe u oblasti nauke u 2016. godini gdje je uplaćivano za doktorske studije i više od 23.000 KM.

Pokreće inicijativu za izmjenu Zakona o sukobu interesa institucijama vlasti u Federaciji BiH, iznalaženje zakonskog modela za formiranje tijela zaduženih za implementaciju spornog zakona, odnosno tijela za vođenje postupka utvrđivanja sukoba interesa izabраних zvaničnika, nosioca izvršnih funkcija i savjetnika u Federaciji BiH.

Pokrenuo je još jednu inicijativu za dopunu Poslovnika Predstavničkog doma Parlamenta Federacije BiH, kojom bi se član 9. dopunio članom 9a. Dao je obrazloženje o ovoj inicijativi.

Prije nego se krenulo raditi, u ime Udruženja RVI paraplegičara, prisutnima su se obratili Mujo Aganović i Adnan Bašić, predstavnik Saveza slijepih boraca.

Prisutnima se obratio i ministar Bukvarević.

Data je pauza pola sata.

Nakon pauze glasalo se o zaključcima.

Sa 78 glasova za, bez glasova protiv i bez uzdržanih glasova, usvojen je sljedeći:

ZAKLJUČAK

Predstavnički dom Parlamenta Federacije BiH zadužuje Vladu Federacije BiH da hitno dostavi prijedlog poboljšanja materijalno-finansijskog položaja ratnih vojnih invalida 100% I. grupe, koji se odnosi na izmjenu Zakona o pravima branilaca i članova njihovih porodica u duhu Zaključka donesenog 22.12.2015. godine na 6. redovnoj sjednici i inicijative zastupnika vezane uz ovaj zakon, podnesene 30.11.2016. godine. Predstavnički dom Parlamenta Federacije BiH zahtjeva od Federalnog ministarstva za pitanja boraca i invalida odbrambeno-oslobodilačkog rata da u saradnji sa nadležnim kantonalnim ministarstvima i upravama, a u skladu sa Zakonom o pravima branilaca i članova njihovih porodica, kao i Zakona o dopunskim pravima branilaca u kantonima, u roku 20 dana dostave potpunu informaciju Parlamentu, odnosno Odboru za boračka i invalidska pitanja Predstavničkog doma Parlamenta Federacije BiH o statusu ratnih vojnih invalida I. grupe 100%.

Prijedlog dnevnog reda zastupnici su dobili uz poziv za sjednicu.

U međuvremenu Vlada je poslala dopis, kojim traži uvrštavanje u dnevni red sjednice - Prijedlog Odluke o prihvatanju zaduženja o Ugovoru o zajmu između BiH i Evropske banke za obnovu i razvoj (EBRD) za Projekt Vodovod Sarajevo. Također, rukovodstvo Doma predlaže da se uvrsti i tačka - Usaglašavanje tekstova različito usvojenih u domovima Parlamenta Federacije BiH.

Damir Mašić predložio je dopunu dnevnog reda: Situacija u Kliničkom centru Univerziteta u Sarajevu sa posebnim osvrtom na uvjete liječenja pacijenata, odlazak velikog broja najstručnijeg kadra. Predlaže još jednu dopunu dnevnog reda: Predstavnički dom Parlamenta Federacije BiH zadužuje Vladu Federacije BiH da u roku 60 dana putem upravljačkih struktura javnim preduzećima iz nadležnosti Vlade Federacije BiH i preduzeća sa većinskim državnim kapitalom u kojima prava upravljanja vrši Vlada Federacije BiH osigura brisanje svih etničkih prefiksa iz njihovih naziva putem odgovarajuće izmjene statutarnih i drugih potrebnih akata u tim javnim preduzećima, te da o tome podnese pisani izvještaj Parlamentu Federacije BiH.

Usljedila je rasprava u kojoj su učestvovali: Ismet Osmanović, Elma Đogić, Munib Jusufović, Safet Kešo, Ilhan Bušatlić, Jozo Bagarić, Dževad Adžem, Dženan Đonlagić i Damir Mašić.

Sa 57 glasova za, uz jedan glas protiv i uz osam uzdržanih glasova, usvojen je prijedlog Vlade Federacije BiH da se u dnevni red uvrsti tačka - Prijedlog Odluke o prihvatanju zaduženja o Ugovoru o zajmu između BiH i Evropske banke za obnovu i razvoj (EBRD) za Projekt Vodovod Sarajevo.

Sa 55 glasova za, uz osam glasova protiv i uz tri uzdržana glasa, usvojeno je da se u dnevni red uvrsti tačka - Usaglašavanje tekstova različito usvojenih u domovima Parlamenta Federacije BiH.

Prijedlog Damira Mašića da se u dnevni red uvrsti tačka - Situacija u Kliničkom centru Univerziteta u Sarajevu sa posebnim osvrtom na uvjete liječenja pacijenata, odlazak velikog broja najstručnijeg kadra - nije usvojen (43 glasa za, 23 glasa protiv i 14 uzdržanih glasova).

Elma Đogić predložila je da se sa dnevnog reda skine 4. tačka - Prijedlog Zakona o izmjeni Zakona o finansijskoj konsolidaciji privrednih društava u Federaciji BiH - što nije usvojeno (18 glasova za, 28 glasova protiv i 17 uzdržanih glasova).

Po pitanju drugog prijedloga zastupnika Damira Mašića, predsjedavajući je tražio da se zaključak formulira kao tačka dnevnog reda. Uslijedila je rasprava u kojoj su učestvovali: Damir Mašić, Edin Mušić, Ismet Osmanović, Mahir Mešalić, Elzina Pirić, Ilhan Bušatlić, Elvir Karajbić, Safet Kešo i Azra Hadžiahmetović.

Predsjedavajući je pozvao zastupnike da se izjasne o prijedlogu Vlade da se Prijedlog Zakona o izmjenama i dopunama Zakona o visini stope zatezne kamate na javne prihode razmata po hitnom postupku, što nije usvojeno (39 glasova za, 22 glasa protiv i osam uzdržanih glasova).

Predsjedavajući je pozvao zastupnike da se izjasne o prijedlogu Vlade da se Prijedlog Zakona o izmjeni i dopuni Zakona o federalnim upravnim taksama i tarifi federalnih upravnih taksi razmata po hitnom postupku, što nije usvojeno (35 glasova za, 26 glasova protiv i šest uzdržanih glasova).

Predsjedavajući je pozvao zastupnike da se izjasne o sljedećem dnevnom redu:

1. Prijedlog Zakona o izmjeni Zakona o finansijskoj konsolidaciji privrednih društava u Federaciji BiH – hitni postupak,
2. Prijedlog Zakona o izmjeni Zakona o utvrđivanju i ostvarivanju potraživanja građana u postupku privatizacije – skraćeni postupak,
3. Prijedlog Zakona o izmjeni Zakona o matičnim knjigama – skraćeni postupak,
4. Prijedlog Zakona o računovodstvu i reviziji u Federaciji BiH,
5. Prijedlog Zakona o registru finansijskih izvještaja,
6. Nacrt Zakona o izmjenama i dopunama Zakona o fiskalnim sistemima,
7. Prijedlog Odluke o prihvatanju zaduženja po Ugovoru o zajmu između BiH i Evropske banke za obnovu i razvoj (EBRD) za realizaciju Projekta Vodovod Visoko,
8. Prijedlog Odluke o prihvatanju zaduženja po Ugovoru o zajmu između BiH i Evropske banke za obnovu i razvoj (EBRD) za Projekt Vodovod Sarajevo,
9. Prijedlog Odluke o prihvatanju zaduženja po Sporazumu o zajmu između BiH i Svjetske banke - Međunarodne banke za obnovu i razvoj (IBRD) za Projekt jačanja bankarskog sektora,
10. Usaglašavanje tekstova zakona različito usvojenih u domovima Parlamenta,
11. Izbori i imenovanja.

Na osnovu pojedinačnog izjašnjavanja nije usvojen dnevni red 24. redovne sjednice (40 glasova za, 23 glasa protiv i 11 uzdržanih glasova a 14 zastupnika nije glasalo).

Sjednica je završila u 16.46.

Transkript i prijepis transkripta sjednice čine sastavni dio Zapisnika.

v. d. SEKRETARA
PREDSTAVNIČKOG DOMA
PARLAMENTA FEDERACIJE BIH

Stela Ibrović

PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BIH

Edin Mušić